

Il sistem dal maiorz – ina dumonda da pussanza

Suenter la decisiun da Losanna cumenza il giu giuridic tar nulla

CUN ANDREAS AUER HA DISCURRÌ
CLAUDIA CADRUVI / ANR

■ **Il cumbat davart il sistem d'eleger en il Grischun cuntinua probabel il 2017. Suenter la decisiun dal tribunal federal ston ils recurrents cumenzar tar nulla ed anc ina giada ir la via spuretga atras tuttas instanzas giuridicas. Quai po cuzzar trais u quatter onns.** L'emna passada ha il tribunal federal publitgà sia decisiun davart il maiorz en il Grischun. Decidi en chaussa n'ha il tribunal nagut. El ha sulet constatà – sco gia la dretgira administrativa chantunala – ch'il recurs saja vegnì inoltrà memia tard. In di suenter las eleziuns dal 2014 aveva la gruppa da recurrents purtà plant. Gist fissi stà dad inoltrar il plant gia il 2013, immediat suenter che la regenza aveva annunzia las eleziuns.

Ils recurrents stattan uss qua cun mauns vids. Tant sco segir èsi dentant ch'i vegn puspè a dar in recurs (guarda fanestra). *Andreas Auer*, l'advocat dals recurrents ed anteriur professer per dretg statal, prenda posiziun.

Tge schais Vus da la decisiun dal tribunal federal?

Andreas Auer: Ins sto discurre d'in uschenumna «Leerlauf» pervi d'ina rashun furmal-giuridica. Igl è ina stgisa per betg stuair tractar la problematica principala. Entras il sistem da maiorz restan ils burgais grischuns vinavant violads en lur dretgs. Betg ils recurrents ch'èn ids a Losanna han pers, mabain ils burgais grischuns. Dapi decennis vegnan ils dretgs da votar dals Grischuns violads. Cun ina stgisa marscha ha il tribunal federal refusà da prender ina decisiun en materia. Il tribunal federal sa fa uschia mo ridicul.



N'è il tribunal federal betg simpelmain sa nuspi da sa maschadar en ina chaussa chantunala?

Sa chapescha ha il pievel grischun gia votà otg giadas davart il maiorz. Quai na vul betg dir che quest sistem saja confirmà a la costituziun. Il sistem da maiorz grischun cunterfa a la costituziun. Nus avain fatg valair che la decisiun da la dretgira administrativa grischuna saja arbitrara e formalisticamain stravagada. Sin noss arguments n'ha il tribunal federal dà nagina risposta.

Vilenta questa decisiun?

Plaschair n'hai jau segir betg. Il tribunal federal avess gi qua la chaschun da cun-

tinuar sia giurisdicziun sco tar sia decisiun davart il sistem da maiorz dal Appenzell dado. Suenter quest uschenumna «Leerlauf» èsi uss puspè da far in recurs l'atun 2017 cura che la regenza annunzia las votaziuns chantunalas. Igl è da quintar che la dretgira administrativa di ch'ella na saja betg competententa e ch'ins sto anc duas giadas ir fin avant dretgira federala. Sin il pli baud en trais u quatter onns avain nus lura ina decisiun en materia. Quest temp è pers e per il giat. La decisiun dal tribunal federal è in schlaffada enturn las ureglias per il recurrents, ma era per ils votants e las votantas.

Pertge è il tribunal federal uschè precaut?

Dapi var diesch u quindesch onns ha il tribunal federal giugà ina rolla activa appartegnent il sistem da proporz en ils chantuns. A blers n'ha quai betg plashi. Forsa giogan era las iniziativas chantunalas dad Uri e Zug ina rolla. Lezzas pretendan ch'ils chantuns sappian concepir a moda autonoma lur systems dad eleger. Il tribunal federal n'avess da dir nagut pli. Il cussegl naziunal ha gia ditg gea a questas iniziativas chantunalas. La chombra pitschna ha anc da decider. Po dar che quai ha giugà ina tscherta rolla.

Èsi gia cler co ch'i va vinavant? Vegn la medema gruppa da recurrents puspè ad ir avant dretgira il 2017?

Jau sun persuadì ch'i dat puspè in recurs. Intgins da la gruppa m'han gia ditg ch'els sajan puspè da la partida. En sasez basta in soli votant. Mintga burgais grischun ha il dretg dad inoltrar in recurs. Igl è dentant ina lunga via spuretga che maina sur la dretgira administrativa grischuna fin al tribunal federal.

Dessi in'otra schliaziun?

Gliez fiss in'ulteriura iniziativa populara per il sistem da proporz – per la novavla giada. Ma las partidas etablidhas sa dostan sa chapescha cun pes e mauns. I n'è en sasez betg ina dumonda giuridica. Igl è ina dumonda da la pussanza. Lezza defendan ins cun tutta forza. La repartiziun dals sez en il cussegl grond è propi malgista. Cun il sistem da maiorz èsi uschia: Tgi che elegia en Purtenza la Partida cristiandemocratia po gist uschè bain smanar ses cedel da votar en il chanaster da palpiri. E tgi che elegia la Partida socialdemocratica en Surselva po era smanar davent il cedel da votar, i

vegn ora sin il medem. Las trais partidas grondas, la pcd, pld e pbd gudognan ils blers sez e las partidas pitschnas ston succumber. Il 2014 è la pps perfin stada pli dischavantagiada ch'ìls socialdemocrats.

Ps e pps quintan cun in nov recurs

Tgi che inoltrescha il proxim recurs encunter il maiorz grischun n'è anc betg segir. Tschert è be ch'i dat puspè in recurs. Uschia tuni tar la ps e pps.

Il sistem da maiorz gida ils grondas e strufegia ils pitschens. Las partidas pitschnas han miseria da vegnir sin in dumber andant da sez en il cussegl grond. La gruppa che ha recurrì fin avant il tribunal federal sa cumpona perquai da persunas da la pps, ps, verda, verd-liberals.

«Pauc bel», commentescha Andrea Davaz, vice da la pps grischuna, l'agir dal tribunal federal. «Ma nus vegnin a tschertgar ina decisiun. Nus vulain ch'il tribunal federal prenda posiziun. Nus vulain savair sch'il sistem d'eleger dal Grischun è en urden u betg.» Sch'ins vegnia puspè a recurrer cun ina gruppa da pliras partidas u far in recurs singul na saja anc betg cler. Cler saja be ch'ins vegnia questa giada a proceder formalmain correct.

Era la ps n'haja anc prendì naginas decisiuns concretas, di il president da partida *Philipp Wilhelm*. «Dir pon ins be ch'ins portia en mintga cas plant.» Probabel na vegnia puspè betg la partida sezza ad ir avant dretgira, mabain singulas persunas privatas che sajan commembras da partida. La ps beneventia in tal recurs.